



Broj: 03/1-50-14-7-30-8/16

Sarajevo, 26.10.2016.

PREDMET: Informacija o obavljenoj radnoj posjeti Komandi 6. pješadijske brigade OSBiH, Banja Luka, 20.9.2016.

Sifet Podžić, predsjedavajući, i Šemsudin Mehmedović, član Zajedničke komisije za odbranu i sigurnost BiH, Boško Šiljegović, parlamentarni vojni povjerenik BiH, Ljiljana Milićević, sekretarka, i Željko Grubešić, stručni savjetnik, bili su u radnoj posjeti Komandi 6. pješadijske brigade Oružanih snaga BiH (6. pbr.) sa sjedištem u Banjoj Luci.

Članovi Zajedničke komisije realizirali su ovu posjetu u skladu s Godišnjim planom rada za 2016. i s ciljem upoznavanja sa stepenom realizacije zaključaka s 21. i 27. sjednice koji se odnose na proces javnih nabavki u sektoru odbrane. Na 21. i 27. sjednici Zajedničke komisije, između ostalog, zaključeno je da će Zajednička komisija nastaviti s posjetama jedinicama i komandama, te će ponovo zakazati tematsku sjednicu na kojoj će s menadžmentom Ministarstva odbrane BiH i Zajedničkim štabom OSBiH sagledati provođenje Operativnog plana za prevazilaženje problema u javnim nabavkama u Ministarstvu odbrane i OSBiH i, u skladu sa svojim nadležnostima, dati ocjenu stanja u Oružanim snagama BiH, te tako nastaviti realizaciju planskih aktivnosti Zajedničke komisije u sektoru odbrane.

Brigadni general Radovan Ilić, komandant 6. pbr., general-majori Mirko Tepšić, zamjenik načelnika Zajedničkog štaba OSBiH, i Dragan Vuković, komandant Operativne komande OSBiH, sa saradnicima bili su domaćini ove radne posjete čiji je cilj bio upoznavanje s trenutnim stanjem i aktivnostima ove brigade.

Generali Ilić, Tepšić i Vuković upoznali su predstavnike PSBiH s misijom, strukturom, razmještajem komande i jedinica, stanjem popunjenosti personala za vrijeme izvođenja operacija i obuke, težišnim zadacima, logističkim osiguranjem brigade te nizom problema s kojima se susreću u svom radu, što daje sliku o stanju u ovoj brigadi (u prilogu: Informativni brifing 6. pbr.).

Prepoznatljivi su veliki naponi koje čini general Ilić i Komanda 6. pbr. OSBiH u izvršavanju postavljenih zadataka i obaveza. Odlučni su, profesionalni i opredijeljeni u izvršavanju misije koju ima 6. pbr. Komandni kadar je do kraja opredijeljen da nastavi ispunjavati brojne

obaveze koje su pred njima. Bez obzira na otežane uslove rada, nema vanrednih događaja koji ugrožavaju stanje borbene gotovosti 6. pbr.

Tokom posjete konstatirani su problemi s kojima se suočava ova jedinica, a ogledaju se u sljedećem:

- **Teškoće u vezi s nepopunjenošću personalom te nedostatak 208 profesionalnih vojnih lica predviđenih prema formaciji.** Ovaj problem dodatno usložnjava sve učestalija pojava napuštanja Oružanih snaga BiH. Prema podacima iznesenim na informativnom brifingu u 2015. i dijelu 2016. godine, ovu brigadu napustilo je ukupno 75 profesionalnih vojnih lica. Sve je učestalija i pojava korištenja bolovanja. Izražena je potreba prijema u službu profesionalnih vojnih lica iz kategorije podoficira i oficira. Vojnici koji napuštaju OSBiH nezadovoljni su, između ostalog, visinom plaća i naknada te su u proteklim godinama neprekidno insistirali na tome da se promijene pravilnici kojima se regulira ova oblast. Tu i dalje nema adekvatne reakcije nadležnih iz MOBiH i ne primjenjuje se Pravilnik o profesionalnom razvoju i upravljanju karijerom.
- **Sigurnost objekata za smještaj ljudi i MTS-a nije na zadovoljavajućem nivou.** Opterećenost profesionalnih vojnih lica koja osiguravaju stražu, broj lokacija za osiguranje, nedostatak sredstava tehničke zaštite, kao i manjak motivacije samo su neke od navedenih teškoća.
- **Logističko osiguranje u kontinuitetu je neredovno i nedovoljno.** Teškoće u vezi s logističkom podrškom ovoj brigadi ogledaju se u kašnjenju ugovora za snabdijevanje i održavanje, a poseban problem predstavlja nedostatak kontinuiteta u nabavci potrebnih namirnica i drugih materijalno-tehničkih sredstava. Dotrajalost uniforme, kao i nezadovoljavajuće stanje motornih vozila istaknuti su, također, kao gorući problemi ove brigade. Operativnost putničkih i terenskih motornih vozila je 23,5%, a teretnih 25,4%.
- **Izražene su teškoće u vezi sa stanjem infrastrukture - nezadovoljavajuće stanje objekata za smještaj straže (na lokacijama Kozara i Glamoč), urušavanje krovova na lokaciji Kozara, problemi s grijanjem na lokacijama Kozara, Bihać i Doboj, kao i loše stanje elektro i vodovodnih instalacija.**
- **Smanjenje iznosa blagajničkog maksimuma,** složenost procedura trošenja te neophodnost decentralizacije ovog procesa također su istaknuti kao teškoće ove brigade.
- **Krši se Pravilnik o ishrani** – ishrana je jednolična i nagomilane su količine i zalihe konzervi različitog sastava kojima već prolazi rok upotrebe, te su jedinice primorane da ih vraćaju u logističke baze. Prva isporuka svježeg povrća i voća u jedinicama za 2016. godinu počela je u septembru.
Iako se kvartalno trebaju sve klase namirnica, u skladu s potrebama i planiranim budžetskim sredstvima, izostaje realizacija, i to svakodnevno i dodatno usložnjava stanje u jedinicama OSBiH.

- **Zastarjelost opreme koju koriste pripadnici ove brigade.** Motorna vozila koja su u upotrebi stara su u prosjeku više od 27 godina i više od 70% ih nije operativno. Nedostaju potrebni rezervni dijelovi, alati i pribor. Nedostaje motorno ulje za motorna vozila, što dodatno ugrožava ionako nizak stepen njihove operativnosti. Nedostaju stručne osobe za redovno održavanje naoružanja i vojne opreme, birotehničkih, elektronskih sredstava, kao i opreme specijalne namjene. Upitna je rentabilnost popravke za veliki broj materijalno-tehničkih sredstava kod vanjskih servisera koja su na upotrebi u 6. pbr. Jeftinija je kupovina novih sredstava nego popravke i remont onoga što je na upotrebi u 6. pbr.
- **Izražen je kontinuirani problem u snabdijevanju intendantskom opremom,** a posebno je kritično stanje s radnim uniformama kojih više nema u zalihama.
- **Nedostatak energenata** - i pred narednu grijnu sezonu nisu ugovorene adekvatne isporuke te se postavlja pitanje zaštite ljudskih prava pripadnika Oružanih snaga BiH koji već nekoliko godina imaju probleme s grijanjem prostorija u kojima žive i rade. Jedinice za stražarsko osiguranje objekata prevoze se vozilima koja su u lošem stanju, što zabrinjava Komandu 6. pbr. OSBiH jer je riječ o životima pripadnika OSBiH.
- **Osiguranje neperspektivnih lokacija** - logistička podrška ne prati realizaciju godišnjeg plana obuke i godišnjeg plana rada. Sve je izraženije nezadovoljstvo pripadnika OSBiH uslovima života i novčanim naknadama za vrijeme boravka na terenu.

Posebno brine činjenica da Sektor za logistiku i snabdijevanje Ministarstva odbrane BiH ne ugovara na vrijeme isporuke energenata pred predstojeću zimu, kao i potrebne rezervne dijelove za vozila, što direktno umanjuje operativne mogućnosti ove jedinice.

Zaključak

1. Radne posjete jedinicama i komandama Oružanih snaga BiH su neophodne i predstavljaju nezamjenjiv način u upoznavanju s pravim stanjem i funkcioniranjem sektora odbrane u cjelini.
2. Postojeći problemi se ponavljaju već dugi niz godina i nije uočljiv nikakav pomak u njihovom rješavanju, a odnose se, prije svega, na logističko osiguranje i snabdijevanje Oružanih snaga BiH. Početak snabdijevanja jedinice svježim voćem i povrćem tokom septembra 2016. godine je privremeno olakšao aktuelne probleme sa ishranom vojnika.
3. I dalje se koristi oprema koja je stara i kojoj ističu rokovi upotrebe, a što je posebno evidentno kod motornih vozila, logorske opreme i sredstava koja su potrebna za adekvatnu operativnost Oružanih snaga BiH u cjelini.
4. Nedostatak prehrambenih artikala, pogonskog goriva, uniformi i intendantske opreme posebno je zabrinjavajući i postavlja se pitanje do kada će nadležni u Ministarstvu odbrane BiH ravnodušno gledati na ovaj problem.
5. Krajnje je vrijeme da nadležne službe i sektori iz sastava Ministarstva odbrane BiH i Zajedničkog štaba Oružanih snaga BiH posjete jedinice i komande, te da se neposredno upoznaju sa stanjem i otklone goruće probleme koji su iz dana u dan sve

izraženiji, posebno zbog neefikasnog, neredovnog i neadekvatnog logističkog osiguranja i snabdijevanja.

PREDSJEDAVAJUĆI KOMISIJE
Sifet Podžić

Prilog:

- Informativni brifing 6. pbr. OSBiH, od 20.9.2016.

Dostavljeno:

- naslovu
- a/a